



БОЛАШАҚҚА ҚАДАМ САНАЛЫ ҰРПАҚ ТӘРБИЕЛЕУДЕН БАСТАЛАДЫ

Қазіргі таңда заман ағымына көз салған адам кім-кімнің де тіршілік қамымен жанталаса еңбек етіп жатқанын байқайды. Әрине, еңбек түбі – береке екені рас. Алайда, адамның рухани дүниесі берік болмаса тапқанында береке болмайды. Руханиятының орнын толықтыра алмаған адам өмірден түңіліп кетуге дейін барады. Рухани жұтандықпен күрестің бірден-бір жолы – көкірек көзін ашып, үнемі өзін-өзі жетілдіріп отыру. Руханияттағы бос орынды толтыру

жолында қаншама жастар дұрыс бағытты таба алмай, теріс діннің арбауына түсіп кетті. Жат ағымдарға жетелеушілер сол адамдардың психологиялық күйзелістегі сәтін пайдаланып, қиын сәттерде қолдап, қол ұшын берді.

Міне, ақша табудың қамында жүрген, бала тәрбиесіне көңіл бөлуге, баласымен сырласуға уақыт таппаудың соңы осындай қасіреттерге әкеледі. Отбасылық институттың құлдырауы, әлеуметтік жағдайдың төмендігі, жастардың ауқатты өмір сүруді бірінші орынға қоюы, олардың жеңіл жолмен ақша табуға әуестенуі, ұрлық пен арбаудан құралған сауда-саттықпен айналысуы – міне, осылар бүгінгі рухани азғындаудың

алғашқы баспалдақтары. Сондықтан еңселі ел боламыз десек, жастарға дұрыс тәрбие беру жолында қажымай-талмай еңбек етуіміз қажет. Себебі, болашаққа қадам саналы ұрпақ тәрбиелеуден басталады.

Ал, оның түп-негіздері «Рухани жаңғыру» мақаласында жатыр. Мақала жарияланысымен халықтың ата-бабаларының асыл мұраларымен кеңінен танысуына кең жол ашылып, руханиятымызға жаңа леп әкелгендей болды. Кейбіреулер айтып жүргендей, ол өткен бабалар заманына оралып, дәл солар көшкен замандағыдай ақпараттық технология немесе заманауи құрылғыларсыз өмір сүріп, заманауи дүниелерден жырақтану емес. Керісінше,

заман ағымына бейімделе отырып, заманауи қазақтың озық бейнесін қалыптастыру қажет. Бұл ұлтымызға тән барлық тарихи, әдеби, т.б асыл жәдігерлерімізді бағалап, оны түйсініп, санамызға берік сіңіру арқылы жүзеге асады. Бабаларының дінін, ділін, салтын білген және оны түсінген ұрпақ басқа жолды таңдау тұрмақ, тіпті, ондай күдікті ойға да берілмейді.

**Гауһар НАЗАНОВА,
М.Әуезов атындағы ОҚУ-дың
«Мәдени және әлеуметтік
жұмыс» кафедрасының
аға оқытушысы, магистр.**